



Broj: 04-04-4-1455/24
Sarajevo, 3. 5. 2024. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„UČINKOVITOST POTICAJA U POLJOPRIVREDI“**

Ured za reviziju institucija u Federaciji Bosne i Hercegovine proveo je reviziju učinka „**Učinkovitost poticaja u poljoprivredi**“, s ciljem ispitivanja da li su nadležne institucije osigurale uslove za efektivno upravljanje poljoprivrednim poticajima, te da li se postižu zadovoljavajući rezultati.

Revizija je obuhvatila Federalno ministarstvo poljoprivrede, vodoprivrede i šumarstva i kantonalna ministarstva nadležna za poljoprivredu iz Unsko-sanskog, Tuzlanskog, Hercegovačko-neretvanskog i Posavskog kantona.

Rezultati revizije su pokazali da na području Federacije BiH nadležne institucije nisu osigurale uslove za efektivno upravljanje poljoprivrednim poticajima i da se implementacijom poljoprivrednih poticaja ne postižu zadovoljavajući rezultati.

Poljoprivredni poticaji nisu planirani na odgovarajući način s obzirom da nisu bili u skladu sa strateškim ciljevima i principima iz Strategije razvoja poljoprivrede i ruralnog razvoja 2015–2019. godine, čiju je primjenu Vlada FBiH produžavala svake godine, niti je izvršena obaveza prilagođavanja Zajedničkoj poljoprivrednoj politici Evropske unije.

Postavljeni ciljevi novčanih poticaja bili su općeniti i bez odgovarajućih indikatora za praćenje ostvarenih učinaka. Nije uspostavljena odgovarajuća harmonizacija između kantonalnih i federalnih programa utroška poticajnih sredstava, kako nalažu propisi, što je negativno uticalo na konkurentnost poljoprivrednika. U posmatranom periodu dolazilo je do **kašnjenja prilikom usvajanja federalnih i kantonalnih programa**, zbog čega su poljoprivrednicima nedostajale blagovremene informacije o proizvodnjama koje su obuhvaćene programima poticaja.

Nisu uspostavljeni funkcionalni poljoprivredni registri, sistemi za identifikaciju zemljišnih parcela i životinja niti poljoprivredni informativni centar, koji predstavljaju osnovne pretpostavke za odgovarajuće planiranje i praćenje efekata poljoprivrednih poticaja. Utvrđeno je da nadležna ministarstva **ne prate na odgovarajući način efekte poljoprivrednih poticaja**, te da postojeći **izvještaji ne pružaju sveobuhvatne informacije** o stanju poljoprivrede.

Nije ostvareno povećanje ukupne poljoprivredne proizvodnje i brojčanog stanja stočnog fonda uprkos utrošenim budžetskim sredstvima za novčane poticaje u FBiH, koji su u periodu 2020–2022. godine iznosili cca 381 milion KM. Također, svi dostupni makroekonomski pokazatelji ukazuju da **poljoprivredna proizvodnja uglavnom stagnira, a u određenim segmentima ima i trend smanjenja.**

Ured za reviziju cijeni da je neophodan značajniji angažman federalne i kantonalnih vlada, kao i ministarstava nadležnih za oblast poljoprivrede, kod planiranja i harmonizacije federalnih i kantonalnih programa, kao i kod praćenja efekata koji se ostvaraju ulaganjem budžetskih sredstava u poljoprivredu. Provođenje preporuka i poduzimanje korektivnih mjera doprinijelo bi povećanju poljoprivredne proizvodnje, boljem položaju poljoprivrednih proizvođača i smanjenju ovisnosti od uvoza poljoprivredno-prehrambenih proizvoda.

Izvještaj revizije učinka dostupan je na internet-stranici Ureda za reviziju: www.vrifbih.ba.



GENERALNI REVIZOR
Dževad Nekić